

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Komisija za jednakopravnost spolova
Broj: 02/9-02-1807/23
Sarajevo, 26.06.2023. godine

**DOMU NARODA
PARLAMENTA FEDERACIJE
BOSNE I HERCEGOVINE**

Komisija za jednakopravnost spolova Doma naroda Parlamenta Federacije Bosne i Hercegovine na 2. sjednici održanoj 26. juna 2023. godine, razmatrala je sljedeće tačke dnevnog reda:

- 1. Konsultacije u vezi budućeg djelovanja Komisije u smislu podrške u izradi propisa za uređenje pitanja jednakopravnosti;**
- 2. Informacija sa sastanka sa Komisijom za jednakopravnost spolova Predstavničkog doma Parlamenta Federacije Bosne i Hercegovine;**
- 3. Tekuća pitanja.**

Na osnovu člana 51., a u vezi sa članom 63. Poslovnika o radu Doma naroda Parlamenta Federacije Bosne i Hercegovine, Komisija podnosi Domu naroda sljedeći

IZVJEŠTAJ

- 1. Konsultacije u vezi budućeg djelovanja Komisije u smislu podrške u izradi propisa za uređenje pitanja jednakopravnosti**

Komisija za jednakopravnost spolova Doma naroda Parlamenta Federacije Bosne i Hercegovine je razmatrala navedenu tačku dnevnog reda i pritom konstatovala sljedeće:

Nadležnosti Komisije za jednakopravnost spolova Doma naroda Parlamenta Federacije Bosne i Hercegovine definisane čl. 63. Poslovnika o radu Doma naroda Parlamenta Federacije Bosne i Hercegovine podrazumijevaju, između ostalog, i saradnju sa radnim tijelima Predstavničkog doma Parlamenta Federacije Bosne i Hercegovine, (čl. 63., stav 4) te, u skladu s tim, predsjednica Komisije, Aida Obuća, upoznala je članove Komisije da je održala sastanak sa Almom Kratina, predsjednicom Komisije za jednakopravnost spolova Predstavničkog doma Parlamenta Federacije Bosne i Hercegovine, kako bi zajedno pokušale pronaći najbolji način za što brže donošenje Zakona za zaštitu od nasilja u porodici u Federaciji BiH. Zakon je, u formi Nacrta, usvojen u julu prošle godine u Domu naroda, odnosno u julu 2021. u Predstavničkom domu, a njegov predlagač bio je delegat Doma naroda Parlamenta Federacije Bosne i Hercegovine, Vitor Handžić.

S tim u vezi, članovi Komisije za jednakopravnost spolova Doma naroda Parlamenta Federacije Bosne i Hercegovine su jednoglasno usvojili sljedeći

Z A K L J U Č A K

Konstatirano je da u izradu budućeg Prijedloga zakona treba uključiti sve zainteresirane strane i obaviti što širu i kvalitetniju javnu raspravu. Naglasak je bio na hitnosti donošenja ovog zakona jer, nažalost, istaknuto je na sastanku, nasilje u porodici je gorući problem bh. društva koji zahtjeva ozbiljan institucionalni pristup i hitna sistemska rješenja, od prevencije do sanacije.

2. Informacija sa sastanka sa Komisijom za jednakopravnost spolova Predstavničkog doma Parlamenta Federacije Bosne i Hercegovine

Komisija za jednakopravnost spolova Doma naroda Parlamenta Federacije Bosne i Hercegovine je razmatrala navedenu tačku dnevnog reda i pritom konstatovala sljedeće.

Predsjednice komisija dogovorile su smjernice za buduće zajedničko djelovanje, od podrške u izradi ranije pomenutog prijedloga zakona za zaštitu od nasilja u porodici, do jednakopravnosti u ostvarivanju brojnih prava, budući da je diskriminacija, kao i sistemski nemar, sveprisutna u Federaciji BiH.

Tako i danas nisu jednaka prava porodilja u svim kantonima iako je problem sa porodiljnim naknadama aktuelan decenijama. Odstupanja su izuzetno velika u ovoj ali i drugim oblastima pa tako nisu jednaka prava na liječenje, kao ni prava porodica sa troje i više djece. Također, pomenuto je i hitno rješavanje problema sa neplaćenim ženskim radom (radom u „sivoj zoni“) i brojna druga pitanja koja

zahtijeva hitno rješenje kako bi svaka žena na svakom pedlju Federacije Bosne i Hercegovine imala mogućnost da ostvari svoja prava.

Pitanja jednakopravnosti izuzetno su važna u kontekstu pristupa EU putu i njihovo rješavanje je neophodno za što će, kako je istaknuto, komisije tražiti pomoć resornih ministarstva, najprije Ministarstva za rad i socijalnu politiku, odnosno ministra Adnana Delić, a onda i Ministarstva pravde, Ministarstva zdravstva, kao i drugih nadležnih institucija. Također, moguće je računati na podršku Gender Centra Federacije BiH kao i nevladinog sektora, koji su više puta dosad, u kontinuiranoj saradnji sa komisijama oba doma, potvrdili svoju opredijeljenost u unaprijeđenju pitanja jednakopravnosti.

Tematska sjednica Komisije za jednakopravnost spolova Predstavničkog doma o temi ekonomije brige i njege i neplaćenom ženskom radu, također je bila u fokusu razgovora.

„Prema podacima Polazne studije o ekonomiji brige i njege u BiH, izrađene od strane Ekonomskog instituta Sarajevo u partnerstvu sa UN Women BiH, i uz podršku Švedske, žene u BiH provedu više od šest sati dnevno na neplaćene poslove brige i njege, u odnosu na muškarce koji provedu nešto više od tri sata. Ujedno, 85 posto žena kuha barem jednom dnevno, dok to radi samo 27 posto muškaraca.”

Održavanje sjednice planirano je sredinom sljedećeg mjeseca.

S tim u vezi, članovi Komisije za jednakopravnost spolova Doma naroda Parlamenta Federacije Bosne i Hercegovine su jednoglasno usvojili sljedeći

ZAKLJUČAK

Predsjednica Komisije, Aida Obuća, informirala je članice i članove o sastanku sa Almom Kratina, predsjednicom Komisije za jednakopravnost spolova Predstavničkog doma Parlamenta Federacije Bosne i Hercegovine. Osim dogovora za buduće zajedničko djelovanje, podršku u donošenju prijedloga Zakona za zaštitu od nasilja u porodici, do zalaganja za jednakopravnost u ostvarivanju brojnih prava najavila je i učešće u Tematskoj sjednici Komisije za jednakopravnost spolova Predstavničkog doma Parlamenta Federacije Bosne i Hercegovine o temi ekonomije brige i njege i neplaćenom ženskom radu, sredinom sljedećeg mjeseca.

3. Tekuća pitanja

Komisija za jednakopravnost spolova Doma naroda Parlamenta Federacije Bosne i Hercegovine je pod ovom tačkom dnevnog reda razmatrala i konstatovala postojanje problema održavanja sjednica radnih tijela isti dan kada se održavaju sjednice Doma naroda Parlamenta Federacije Bosne i Hercegovine i s tim u vezi jednoglasno donijela sljedeći

ZAKLJUČAK

U cilju što kvalitetnijeg, opširnijeg, detaljnijeg i boljeg razmatranja pitanja koji se odnose na problematiku koju razmatra ovo radno tijelo, Komisija za jednakopravnost spolova Doma naroda Parlamenta Federacije Bosne i Hercegovine predlaže održavanje sjednica radnih tijela jedan dan prije održavanja sjednica Doma naroda Parlamenta Federacije Bosne i Hercegovine.

Za izvjestiteljicu na sjednici Doma naroda Parlamenta Federacije Bosne i Hercegovine određena je Aida Obuća, predsjednica Komisije.

PREDSJEDNICA KOMISIJE

Aida Obuća